

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Union Minister Sarbananda Sonowal-an India leh Myanmar inkalpawhna tur KMMTTP kawng chu kum 2027 atangin hman tan ani dawn tih a sawi.
- 2. Rualbanlo te puala sawrkar laipuiin hamthatna a ruahman Sugamya Bharat Yojana hnuaiah Mizoram sawrkarin hmalakna hrang hrang a kalpui.
- 3. Ei leh bara Mizoram intodelhna tur leh kuthnathawktuten awlsam zawka thlai tharchhuah sa an hralh theih nana hma la tu Mission Organic Mizoram hnuaiah thlai tharchhuah tam tham tak ram pawnah thawn chhuah a ni.
- 4. Meghalaya-a lungalhthei khur chhunga thil puak vanga thi zat chu 27 an tling tawh.

<><><>

KMMTTP

Union Minister Sarbananda Sonowal chuan India leh Myanmar inkalpawhna tur Kaladan Multi-Modal Transit Transport Project (KMMTTP) chu kum 2027 atangin hman tan ani dawn tih a sawi.

Guwahati-a chanchinbumite a kawmna ah he thu hi sawiin hmarchhak bial hmasawn nan sawrkar laipui chuan nasa takin hma a la a ti a, KMMTTP Kawngpui India leh Myanmar inkalpawhna tur chu kum 2027 ah hman tan ani dawn tih sawiin hei hian hmarchhak bial hrang hrang chu ramchhung hmun dangte nen awlsam zawka inpawhna a siam thei dawn a ti a, Aizawl leh Kolkata inkar pawh km 700 laiin a tawi phah dawn tih sawiin hmasawmna lian tak a thlen dawn ani, ati.

Union Minister chuan Myanmar-a Sittwe lawng chawlhna hmun peih fel anih tawh thu sawiin, a pumpuia KMMTTP Project pum pui chu kum 2027 ah peih fel vek ani ang ati a ,tuipui atanga inkalpawhna hrang hranga hmasawmna a awm theih nan theihtawp chhuah a nih thu leh , hmarchhak bial chu ramchhunga eizawmna hnar pawimawh tak, ramdang nena insumdawn tawmna kawng pawimawh tak ani tih a sawi bawk.

(Corr)

<><><>

ADVISER TO CM

Adviser to Chief Minister (Agriculture) Dr Lorrain Lalpekliaana Chinzah chuan Ngengpuikai-a Nul siamtute chu Sorkar hmalakna tha taka an tawiawm bakah mithiamte thurawn anga hna an thawk chu fakawm a tih thu a sawi.

Nimin Inrinni a Lawngtlai District-a Ngengpuikai a Nul siamtute tan Training buatsaih a hmanpuina ah Adviser to Chief Minister chuan Ngengpuikai-a Nul siamtute thawhrah chu Lawngtlai khawpuiin kum tam tak chhung an inngahna a ni tawh tih sawiin, mihring pung chho zelah Thlai tharchhuah pawh a pung zel ati a,Kuthnathawktuten tunlai thiamna hmanga hma an lak a pawimawh thu leh Ngengpuikaia Nul siamtute chu KVK Lawngtlai leh Horticulture Department ten theihtawp chhuaha hma an lakpui avanga hlawhtinna hmuh theiha a awm chu lawmawm a tih thu a sawi a, KVK leh Horticulture Department atanga Kuthnathawktute tanpui a sem nghal a ni.

Ngengpuikai a Nul siamtute chuan an Nul tih changtlun nan leh Sorkar hmalakna hlawk zawka an chhawr theih nan Tui pump khawl leh Kawlphetha, Leilehna tur hmanrua an mamawh thu Adiviser to CM hi an hrilha, Dr.Lorrain Lalpekliaana Chinzah chuan an mamawh an thlente chu a theih anga lo bawhzui a tum thu a hrilh a ni.

(Lalnggheta Ralte PTC Lawngtlai)

<><><>

SUGAMYA BHARAT YOJANA

Rualbanlo te puala hamthatna sawrkar laipuiin a ruahman Sugamya Bharat Yojana hnuaiah Mizoram sawrkarin hmalakna hrang hrang a kalpui.

Rualbanlote tana hamthatna hrang hrang a awm theih nana sawrkar laipui ruahman hi Mizorama rualbanlote an hlawkna an chan ve theih nan hmalak zel a ni a, Social Welfare Department hotute sawi danin Mizorama rualbanlote tan disability pension department kaltlangin hamthatna pekehhuak thin a ni a , a mamawh tan dilna hawn reng a ni.

Department hotute chuan Mizoram district hrang hrangah department kaltlangin mumal takin pension sem thin a ni an ti a, National Social Assistance programme hnuaiah sorkar laipui atangin rualbanlo pension hamthatna an dawng thei tih sawiin sorkar laipuia Ministry of Social Justice and empowerment hnuaia directorate te pawhin rualbanlo te puala hamthatna buaipuitu NGO te tan tanpuina dil theih anih thu an sawi.

Department hotute chuan Unique Disability ID (UDID) chu rualbanlo ten hmamthatna an dawn na tura neih ngei ngei tur thil a ni an ti a, hei hi rualbanlo chhungten ngaihven sak se an duh tih sawiin UDID nei tur chuan district hospital panpui phawt a, doctor ten an lo enfiah hnu ah Board in certificate a ziahsak thei reng a, Hamthatna dawng duh tan neih ngei ngei a ngaih thu an sawi a ni.

(Corr)

<><><>

PASTORAL MEET

Mizoram Presbyterian Kohhran Hmeichhia Pastor Bial Inkhawmpui neih mek a ni a, zanin hian a tiak ang.

Bial Kohhran Hmeichhe Inkhawmpui hi February ni 6, Zirtawpni zan kan tan niin Palai lawm leh report inkhawm a ni a, nimin nilengin Rorel a ni a, nizan atanga zanin thlengin vantlang Pathian Biak Inkhawm neih a ni.

Inkhawmpui hman dan tur hi Bial Hmeichhe Committee-in ngaihtuahin a remchan dan anga hman thin a ni a, hemi avang hian bial hrang hranga inkhawmpui hman dan pawh a inang vek lo va, Bial thenkhatah thupui thlan bik neiin speaker ten an sawi thin a, bial thenkhatah chuan bial hruaituten an insawi chhawk thin a, Kristian Chhungkua leh Buhfaithama inelna lawmman hrang hrang sem thin a ni bawk.

Report hnunhung bera a lan danin tun dinhmunah Presbyterian Kohhran Hmeichhe member 2,03,840 an awm mek a ni.

<><><>

SIAHA HIV/AIDS

Siaha District ah kum 2003 January atanga December 2025 inkarah HIV hrik kai 1048 hmuhchhuah an ni.

Integrated Counselling and Testing Centre (ICTC), Chief Medical Office chhinchhiah danin Siaha ah hian kum 22 chhungin HIV/AIDS vei mi 1048 awm in, heng zinga 176 chu nau pai lai an ni a, Kum 2003 January atanga December 2025 thleng khan HIV test 27564 awmin an zing ah hian naupai lai hi 16946 an ni.

District thuneitute chuan HIV hri kai te chu ART ei tha tura chahin mi tin tan mahni dinhmun hriat chian a pawimawh thu an sawi a ni.

(CZ Hluna PTC Siaha)

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchintha puan leh a ni ang.

<><><>

ORGANIC FARMING

Mizoram ei leh bara intodelh tur leh kuthnathawktuten awlsam zawka thlai tharchhuah sa an hralh theih nana hma la tu Mission Organic Mizoram hnuaiah thlai tharchhuah tam tham tak ram pawnah thawn chhuah a ni.

Mission Organic Mizoram tarlan danin sawrkar kum kal ta ah khan Sawhthing Metric tonne 20 leh Hmarchate metric tonne 10, bakah Lakhuihthei metric tonne 4.2, rampawnah thawncchhuah a ni a, heng bakah hian Aizawla Millenium Centre tualzawla Pineapple Bonanza buatsaih atangin lakhuithe metric tonne 9 hralh a ni bawk.

Mission Organic Mizoram thawktute sawi danin kuminah pawh hmasawna an hmuh chhunzawm zel a, thla liam ta January ah khan Lakhuihthei metric tonne 32 chu Guwahati ah thawncchhuah a ni an ti a, Mizo hmarcha metric tonne 4.5 pawh Tripura ah thawncchuakin Mizo hmarcha ro metric tonne 2.5 tualchhungah hralhchhuah ani an ti bawk.

Mission Organic Mizoram hnuaiah hian kuthnathawktu 27604 an inziak lut tawh a, hectare 26,500 ah thlai chi hrang hrang kuthnathawktuten an ching thin a, Mission Organic Mizoram hi kum 2016 khan ding tannin an thawhpui Service Provider te nen Mizoram District hrang hrangah kuthnathawktute hmasawn na turin hna an thawk thin a ni.

(Corr)

<><><>

GINGER MARKETING

Mizoram sorkar chuan sawhthing lei turin hma a la zel a, nimin tlai khan Mizoram Agriculture Marketing Board (MAMB) Pisa-ah Agriculture minister Pu PC Vanlalruata’n chuan Opickpure Organic Private Ltd. te hnen atangin sawhthing leina tur sum a dawng.

Opicpure te hian Sawhthing hi Khuangleng SCC atangin an lei tan dawn a, a bul tanna atan KG nuai 5 man tur cheng vaibelchhe 2 an hlan phawt a, sawhthing hi KG khat Rs 40 in an lei ang - Mizoram sorkar chuan support price a pe dawn a, KG khatah Rs 10 zelin a lo thlawp dawn tihna a ni.

Agriculture Minister Pu PC Vanlalruata chuan Sawhthing a hlawma lei duh lian zawkte nen an inbiak mek thu a sawi a, kuthnathawktu ten KG khat Rs 50 aia to a an lei theih dan tur an ngaihtuah zel tih sawiin, a tlawm berah pawh KG khat chu Rs 50 aia hniam in an hralh dawn lo tih a sawi bawk.

(Corr)

<><><>

MEGHALAYA RESCUE OPERATION

Meghalaya-a lungalhthei khur puahna hmun, Mynsngat-ah chhanchhuah hna thawh chhunzawm zel a ni a, nimin khan ruang 2 hmuh belh lehin heng nen hian he vanduaina thlenga thi zat chu 27 an tling tawh a ni.

Puan tawh angin lungalhthei hi dan lova laihchhuah a ni a, East Jaintia Hills dist Administration hnuaiah Executive Magistrate, police leh Directorate of Mineral Resources mite telna team 5-in dan lova lungalhthei khur siam zawn hna, ngawrh takin an thawk a, hriat theih chinah Umlawang hnuaia hmun 9 atangin lungalhthei MT 3197 leh Umthe-a hmun li atangin MT 351 an man tawh a, dan lova lungalhthei laihchhuah chungchangah hian FIR engemawzat thehluh a ni tawh bawk.

(NSD)

<><><>

PM-MALAYSIA PM TALKS

Prime Minister Narendra Modi-a leh Malaysia Prime Minister, Anwar Ibrahim-a ten vawiin khan Kuala Lumpur-ah ram 2 thawhdunna tur thil pawimawh chi hrang hrang, huamzau takin an sawi dun a, ram himna tih chak tawn dan turte leh ei leh bar lama thawhdunna tih ngheh leh zual dan turte pawh an sawi dun a ni.

Hruaitu 2-te hian inremna thuthlung engemawzat an siam a, chung zingah chuan khuarel chhiatna thlen thulha inpuih tawwna tur leh audiovisual production lama thawh dunte, eirukna do let kawnga thawh dunna turte a tel a, heng bakah hian hriselna leh damdawi lama thawh dunna tur leh scholarship institution dinna turte pawh a tel a ni.

(NSD)

<><><>

AWAMI LEAGUE LEADER DIES IN JAIL

Bangladesh-a Dinajpur Dist Jail-a tang mek, Water Resource Minister hlui, Awami Leage hruaitu pawimawh ni bawk, Ramesh Chandra Sen-a chu a thi a, kum 85-a upa a ni.

Pu Sen-a dinhmun hian nimin zing atang khan hniam lam a pan niin jail leh damdawi in hotuten an sawi a, zing dar 9:10 velah Dinajpur Medical College Hospital-ah hruai a ni a, minute 19 hnu, zing dar 9:29-ah a thi a ni. Dist Jail Supdt, Farhad Sarkar-a chuan tih tur pawimawhte tihfel anih hnuah a ruang hi a chhungte hnenah hlan a nih tur thu a sawi a, hetih lai hian Sen-a hriselna dinhmun vil that anih leh nih lohte, man anih hnua a dinhmun a tlakhniam chak chhan chungchangah erawh thuneituten sawi an nei lo a ni.

Thakurgaon-1 (Sadar) seat atanga MP atan tum 5 thlan tlin tawh, Sen-a hi nikum Aug. ni 16 khan man a ni a, Hospital hotute leh Awami League hruaitute chuan Sen-a hi hriselna hi a tha tawhlo hle niin an sawi a, man a nih lai pawh hian a chaklo hle niin an sawi bawk.

NSD)

<><><>